

Cuira, ils 4 da november 2022

COMMUNICAZIUN A LAS MEDIAS

Novas structuradas da scolaziun per specialistas e specialists da tgira SSS

La branscha da sanadad dal Grischun sa prepara per l'avegnir e modifitgescha il sistem en la scolaziun per specialistas e specialists da tgira. Gia l'onn proxim cumenza l'emprim studi tenor il princip dal lieu d'emprendissadi. Questas midadas succedan ensemen cun il svilup da novas structuradas da scolaziun en il chantun. Il mument per far questas adattaziuns è ideal.

Promover la generaziun giuvna è pli impurtant che mai

La mancanza da specialistas e specialists è er en il Grischun in grond tema. Era la branscha da sanadad è pertutgada. En pli crescha il basegn da prestaziuns da tgira vinavant ils proxims onns. Tant pli decisiv èsi da promover la generaziun giuvna. Igl è damai exact il dretg mument per reponderar e meglierar las structuradas existentas.

In'incumbensa dal Cussegl grond effectuescha ina nov'orientaziun

Inizià questas midadas ha in'incumbensa parlamentara en la sessiun d'october 2019. Il Cussegl grond ha incumbensà la regenza grischuna da procurar per avunda plazzas d'emprendissadi e da praticum per la scolaziun da specialistas e specialists da tgira SSS. Il Departament da justia, segirezza e sanadad ha damai examinà differents models ensemen cun il Departament d'educaziun, cultura e protecziun da l'ambient, la scola specialisada superiura (SSS) e la branscha da sanadad. En consequenza ha la Regenza decidì il 2021 che studentas e students vegnan engaschads a partir da l'atun 2023 mo anc directamain dals manaschis da scolaziun e betg pli sco avant dal Center da furnaziun per la sanadad ed ils fatgs socials (cfss) a Cuira. I tuna simpel da midar da l'engaschament da la scola a l'engaschament dals manaschis. Quai n'èsi però betg.

Ina nova rolla ed ina nova responsablada per la branscha da sanadad

Igl è spert stà cler che l'entir potenzial da scolaziun dal singul manaschi po vegnir nizzegià mo sche la branscha collavura stretgamain. Numerus manaschis grischuns – manaschis pitschens e situads en la periferia – disponan bain da champs d'emprender attractivs, las midadas na pon els però betg realisar sulets. Il 2021 ha cumenzà il project grond cun in plan da realisaziun ambizius. Per pudair realisar la finamira è vegnì engaschà in specialist da cussegliaziun extern en temas da sanadad e da furnaziun e Sandra Brosch sco mainaproject dal project parzial branscha.

La creaziun da sis cuminanze da scolaziun regionalas

Per pudair ademplir las premissas d'engaschament per studentas e students èn tut ils furniturs da prestaziuns s'alliads a sis cuminanze regionalas. Quellas sviluppeschan communablamain las structuradas da la scolaziun. En pli garanteschon ellas ch'igl haja avunda persunal qualifitgà per scolar las studentas ed ils students. Ed ellas porschan plazzas d'emprendissadi per tut ils quatter champs d'emprender necessaris: ospital acut, psichiatria, tgira da lunga durada e spitex.

Il portal d'annunzia è gia online

La midada dal sistem effectuescha er ina reorganisaziun da l'entira procedura d'annunzia, da selecziun e d'assegnaziun. La bransch ha sviluppà in portal d'annunzia che duai simplifitgar a persunas interessadas la procedura da s'annunziar. Sut <https://www.bewerbungsportal.ch/> vegnan las candidatas ed ils candidats manads pass per pass tras l'annunzia ed a la fin inolteschan els online lur dossier. Ultra da quai tschernan las candidatas ed ils candidats tge regiun, tge champ da lavur u tge manaschi ch'els favuriseschan sco lieu d'emprendissadi.

La finamira para d'esser cuntanschibla


«Ils ultims mais èn stads intensivs», di Sandra Brosch, mainaproject da la midada dal sistem en la bransch. «Mo grazia a l'engaschi dals manaschis e la collavuraziun constructiva cun il Center da furmaziun per la sanadad ed ils fatgs socials (cfss) a Cuira e cun il Chantun èsi pussaivel da far questa midada dal sistem impurtanta per la pratica sin l'atun 2023.» Actualmain n'han las persunas responsablas anc betg cuntanschì la finamira, ma il project s'avanza bain e porscha ulteriuras schanzas: «La creaziun da cuminanze da scolaziun per specialistas e specialists da tgira SSS è orientada vers l'avegnir. Il pli effectivas èn las cuminanze, sch'ellas cumpiglian tut las scolaziuns e tut ils perfecziunaments en las professiuns da tgira», concluda Brosch.

Persuna da contact per ulteriuras infurmaziuns:

Monika Schnoz
co-manadra da fatschenta da la Federaziun grischuna da spitex
tel. 081 252 77 22
info@spitexgr.ch

A partir dal 2023: sis cuminanzas da scolaziun regionalas

Mintgina da las sis cuminanzas da scolaziun en il Grischun offera ina vasta purschida da plazzas d'emprendissadi sco specialista e specialist da tgira SSS.



1. Partenz
2. Tavau
3. Grischun dal Sid
4. Grischun Central
5. Surselva
6. Val dal Rain da Cuira

Spezialistas da tgira diplomadas futuras vegnan engaschadas da nov dals manaschis d'emprendissadi grischuns.



Grazia a las cuminanzas da scolaziun èsi garantì che stat a disposiziun avunda personal qualifitgà per las incumbensas da scolaziun.



[Ina professiun ch'è dumandada er en l'avegnir: il basegn da servetschs da tgira vegn a crescer vinavant ils proxims onns.](#)



Federaziun grischuna d'ospitals e da chasas da tgira

La Federaziun grischuna d'ospitals e da chasas da tgira è la federaziun per instituziuns dal sectur da la sanadad e dals fatgs socials da la Svizra Sidorientala. Ella sustegna sias var 100 instituziuns commembras cun 8'000 collavuraturas e collavuratur e represchenta lur interess en la publicitad sco er envers la politica, las autoritads, ils partenaris socials e las assicuranzas.

www.bsh-gr.ch

Federaziun grischuna da spitex

La Federaziun grischuna da spitex è la federaziun tetgala da las 18 organisaziuns da spitex regiunalas dal Grischun. Sco associaziun professiunala e dals patruns sustegna e cusseglia ella sias commembras d'ademplir lur incumbensas. La federaziun funcziunescha sco plattafurma d'infurmaziuns per sias commembras, s'occupa da dumondas relevantas per la spitex e coordinescha incumbensas. Ella tgira il contact cun las autoritads, las assicuranzas da malsauns, las associaziuns chantunalas e federalas ed ulteriuras organisaziuns dal sectur da la sanadad e dals fatgs socials represchentond ils interess da la spitex.

www.spitexgr.ch